

TE HUIHUIURAA API

I neia i te piha neneiraa no te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 1.

Tenuare, 1924.

Mat. 18.

*Aita outou i ite e, o te hiero outou o te Atua, e te parahi
ra te Varua o te Atua i roto ia outou na? E ia haaniivii te
hoê taata i te hiero o te Atua ra, e pohe oia i te Atua; e mo'a
hoi to te hiero o te Atua, e taua hiero ra o outou ia. Korine-
tia 1, 3: 16-17.*

Eaha ia te Taparahi Taata

“Ua parau maira oia ia'na, i teihea ture? Ua na ô
atura Iesu, Eiaha oe e taparahi i te taata, Eiaha oe e faa-
turi, Eiaha e eiâ, Eiaha oe e pari haavare.” Mataio 19:18.

E hara anei te taparahiraa taata? E parau iho â ia
te taata atoa e, E! e hara rahi roa te reira.

A feruri rii tatou i teie nei parau. Eaha ia te auraa no
teie ohipa taparahi taata?

Teie ia te pahonoraa, oia hoi, o te faaoreraraa ia i te tahi
oraraa ta te Atua i horoa mai i te taata nei, oia hoi, te
tiahi-ê-raa'tu ia i te varua no roto atu i te tino, no reira, o
te haapotoraa ia i to tatou oraraa i te fenua nei ta te Atua
i haapao no tatou.

Na roto i teie parau hopea nei, ua tupu te uiraa, a na
ô atu ai e, Eaha te tumu te Atua i tuu mai ai ia tatou i te
fenua nei?

Teie te tumu oia i na reira'i, ia tonohia tatou i te hoê haapiiraa, e ite ai te Atua e, o vai te feia haapao i ta'na ra mau faaueraa.

Na roto i te hi'araa o Adamu ua noaa mai ia tatou te ite i te ino e te maitai, e ua riro tatou ei mea tiamâ, ia maiti i te ino, e aore râ i te maitai mai tei au i to tatou iho hinaaro. Deuteronomi 11: 26-28. O te haapao i ta'na ra mau faaueraa râ, o te maitai ia; area o te ore e haapao o te ino ia.

E ho'i faahou i ta tatou parau tumu. Ehia huru taparahiraa taata e vai nei? Teie te pahonoraa, e piti ia. Eaha na huru taparahiraa taata e piti e vai nei?

Te hoê râ, o te taparahi-poto-noa-raa ia, mai te pupuhiraa, e aore râ, i te tapu-ê-raa i te upoo.

Te piti ra, o te taparahi-haamaoro-noa-raa ia, mai te taata tei haaparuparu i to'na ra tino, na roto i te faataero-raa i taua tino no'na ra.

E ere anei ia i te taparahiraa taata, ia haapoto te taata i to'na iho nei oraraa i te fenua nei? Oia mau ia.

E ia puhipuhi te taata i te avaava ra, te haapoto noa nei oia i to'na pue mahana i te fenua nei, oia hoi, te taparahi nei oia ia'na iho.

E o ratou tei parau e, e ere ia i te mea ino no te tino, ua au te reira i te taata o te parau atu e, e ere ia i te mea ino no te vaa ia vahihia te reira i te hoê toi. No te mea e mea taero roa te avaava. Te vai nei te hoê raau taero i i roto i te reira, e ia faaôhia i roto i te tino nei, ua riro te reira ei haaparuparuraa i te tino taatoa, i te mea e, ua tae roa te reira i roto i te toto, e na te mafatu te toto i opere maite i te mau melo atoa no te tino nei.

Hoê â huru te reira e te taofa e te tî e te ava, i te mea e, e mea taero ana'e teie mau mea no te tino nei.

Na vai e faaite ia tatou e, e mea taero mau ana'e teie mau mea i parauhia nei no te tino?

Na te mau taote rarahi e te roo maitai, na ratou i faaite mai e, e mea au ore roa taua mau mea ra no te tino nei.

E ere atoa i te taote ana'e tei faaite ia tatou i taua mau parau ra, na te Atua râ. E ua horoahia mai teie mau ture ia haapao tatou i te reira, e te ore e haapao ra, e haavâhia ratou no te reira.

A feruri rii tatou i te hoê ohipa i ravehia e te hoê taote i Amerika. Ua rave oia i te hoê avaava rii e navai no te puhipuhiraa hoê. Ua anoi maitai oia i te reira i roto i te tahi tufaa pape rii, rave atura oia i te hoê nira faaote, e ua faaote oia i taua pape avaava ra i roto i te tahi vairaa pape no taua nira ra.

Patia i hora i te iri no te hoê piifare i taua nira ra, e ua pamu oia i taua pape taero ra i roto i te iri o te piifare. E i muri iho a anoi ai tera avaava i roto i te toto o te piifare, e i te taeraa o taua pape avaava ra i to'na mafatu, o to'na pohe-roa-raa ia. E ere anei te reira e tapao no te taero o te avaava. Oia mau roa ia.

E teie te tahi, ia puhipuhi te taata i te avaava i te matamua ra, eaha ia te tumu i mauui ai to'na ra tino taatoa? E eaha ia te tumu oia i pihae atu ai? E eaha te tumu i taviri noa'i to'na upoo e ua paruparu roa to'na tino? E ere anei ia e tapao e, e mea taero te avaava? Oia mau roa ia.

Ia mâtau râ te taata i te puhipuhi i te avaava e i te inu i te taofe e te tî e te ava atoa hoi, ua riro mau oia ei tavini no te reira, no te mea e, ua hiaai puai oia i te reira i te mau mahana atoa.

E mea au anei ia ofati tatou i te faaueraa matamua ta te Atua i horoa mai i te taata nei?

"Haamaitai i hora te Atua ia raua, na ô maira te Atua, ia fanau orua, e ia rahi roa; * * * e ia mana orua i nia iho i te i'a o te tai, e i nia iho i te mau mea e nee haere i nia iho i te fenua nei." Genese 1: 28.

I muri iho i teie nei haamaitairaa, e faariro anei tatou ia tatou iho ei tavini no te avaava e te ava etc? Eita roa'tu te mau taata haapao i te ture a te Atua e na reira. E faariro râ ratou i teie mau mea ei tavini no ratou.

E ia faarirohia teie mau mea ei tavini no tatou, e riro te reira ei aha? E riro te avaava ei raau no to tatou mau vahi i pēpēhia, e ei raau no te puaatoro tei pohe i te ma'i, e te ava râ ei hopuhopuraa ia no te tino, te taofe e te tî râ e au ia no te tahi mau huru ma'i. B. F. S. 86: 1.

Ahiri te Atua i hinaaro ia puhipuhi tatou i te avaava, ua hamani ia Oia i te hoê apoo i roto i to tatou upoo ei ravea no te faarueraa i te au auahi.

A tamata tatou i te faaamu i te puua i te avaava, e i te fainu ia'na i te ava e te taofe e te tî.

E amu e e inu anei oia i te reira? Aita roa'tu ia. No te aha râ? No te mea e, ua ite pāpū oia e, e ere ia i te maa. Atira noa'tu ia teie mau parau ta tatou i taio a'enei, te parau nei te tahi mau taata e, e maa te avaava.

E mea tia roa ia feruri rii tatou e, eaha te maa? Teie ia, o te mea i amuhia, e ua riro te reira ei ora no te pae tino nei.

A tamata râ te taata tei haapii mai e, e maa te avaava e te ava e te taofe e te tî i te amu i teie nei mau mea, e e haapae i te maa mau; ei reira e ite ai oia e, e ere ia i te maa, i te mea e, e riro hoi oia i te pohe roa.

E te mau taata o te faatia i ta ratou mau tamarii ia puhipuhi noa i te avaava, te rave nei ratou i te hara rahi, no te mea e, te taparahi nei ratou i ta ratou iho mau tamarii, e e tae taua hara ra i nia iho i te metua. Buka a Moromona, Nephi 1, 22: 26.

O vai te hoê hau o tei faatia i te mau tamarii ia puhipuhi i te avaava? Aita roa'tu ia hoê.

E ere anei te imihia nei te mau ravea e te tahi mau basileia, e opani-roa-hia'i te avaava? Oia mau roa ia. E

te ite nei ratou e, no te avaava te haere rii noa nei to ratou mau hau i raro.

Te ava râ i te fenua Amerika, ua oti e na i te opanihia e taua hau ra, no te mea e, ua pâpû ratou e, e enemi ino roa te ava no te taata ia faarirohia te reira ei maa.

Te vai nei te hoê pûpû taata o te na ô atu e, e ture ta matou, eiaha e inu i te taofe area râ te mau taata maohi ra, aita e nehenehe ia ratou ia faaoromai, no reira a inu noa.

Eaha, ua hau anei to ratou ite i to te Atua, mai te mea e, e na reira ratou i te parau, te faariro nei ratou i to ratou iho ite ei mea hau a'e i to te Atua?

Eiaha roa tatou e pee atu i te taata tei haapii atura, e aita râ oia i haapao i ta'na i haapii ra. Mataio 23: 3. Eaha ta tatou i hinaaro, te parau a te Atua, e aore râ, te parau a te taata nei? Petero 1, 1: 24, 25.

E hoa ino ma e! ua fatata roa te taeraapiti mai o te Mesia, tei to tatou uputa nei Oia, no reira, o ratou tei ofati i teie mau ture i faaitohia nei, e au roa ia ratou no te tatarahapa.

E tae mai te Mesia i te hora mana'o-ore-hia e te taata nei, no reira, eiaha tatou e vaiiho i te hoê mea no ananahi e oti roa ia ia tatou i teie nei mahana.

Papaiahia e Elavana

Te Hoê Parau Iti ei Faaitoitōraa

(Tuatiraa teie nei parau.)

33. A tatarahapa i ta oe mau hara'toa ra; a opua hua hoi e, eiaha ia hara faahou, a farii mai i te Evanelia o te basileia nei, (Mataio 24: 14;) a faatupu i te ite i roto i to aau, a faaineine hoi oe ia oe iho no te ohipa taa ê e fatata mai nei, e ia tia ia oe na ia tauturu mai i te mau ohipa maitatai atoa ra. A rohi, a faaitoitō hua hoi oe i te imi, ia riro oe ei "taata rave-ohipa" i roto i te ô vine a te Fatu ra i teie nei tau hopea nei ra.

34. Te na ô mai nei Iakobo e, "E au mau taeae ra, ia hahau ê te hoê o outou i te parau mau nei, e na te hoê oia i faaho'i mai; ia ite mai hoi taua taata ra, e o te faaho'i mai i te taata hara i taua e'a hapa na'na ra, e varua te ora ia'na i te pohe, e hara rahi te moe ia'na." Iak. 5: 19-20.

E Tupu ai te Basileia o te Atua i Nia i te Fenua Nei i te Rahi ra,
E e Riro.ia ei Basileia o te Ao

35. Ia tanuhia te hoê huero iti nainai roa i roto i te repo maitai ra, e tupu ia i te rahi ra, e e riro ia ei raau rahi roa. E na reira hoi te basileia o te Atua i te tupuraa e ia faaî-roa-hia te ao atoa nei i te parau-tia a te Atua ra. (Mat. 13: 31-32.) E tupu hoi te hau o te Atua (oia hoi ta'na Ekalesia) i te rahi ra, e e na reirahia hoi i te faatupu-raa-hia e tae noa'tu i te tau e haapao-noa-hia'i to'na hinaaro i nia i te fenua nei mai tei haapao-atoa-hia i nia i te ra'i ra. Mataio 6: 10.

36. Te parahi nei tatou i nia i te fenua nei i te tau hopea nei. Ua faatiahia te mou'a ra o te fare o Iehova i nia i te tupuai mou'a. Ei reira'toa hoi te hiero o te Atua e faatiahia'i. Te tairuru noa maira hoi te mau etene e rave rahi i taua vahi ra, (oia hoi i te fenua Amerika) e te tupu noa nei â hoi te mau tohu a te peropheta ra a Mika, o tei na ô mai i roto i te pene maha, e na irava matamua ra e:

37. "E riro ia tae i te mau mahana hopea ra, e faatiahia'i te mou'a ra o te fare o Iehova i nia i te tupuai mou'a, e faateitehia ia i nia i te mau aivi; e tairuru atoa mai te mau etene i reira. E rave rahi te fenua e haere, e parau ai e, E haere mai, e haere tatou i nia i te mou'a o Iehova, i te hiero o te Atua o Iakobo; e na'na e haapii mai ia tatou i ta'na haapaoraa, e haere tatou na te e'a ta'na e faaite maira: na Ziona'tu hoi te ture i te revaraa'tu, e te parau a Iehova, i na Ierusalema'tu ia." A hi'o Isaia 2:2-3.

38. E e na reirahia hoi te taata nei i te haapii-noa-hia mai i te ohipa maitatai atoa ra, e tae noa'tu i te mahana e i

roa'i te aau o te taata nei i te ite i te hinaaro mau o Iehova ra, e e ite ai hoi ratou i te mau parau i heheuhia mai e ana, e te mau ture hoi ta'na i haamau ra ei faatereraa i teie nei ao e te mau mea'toa i roto ra.

39. "E ore ratou e hauti, e ore e rave ino, i to'u atoa nei mou'a mo'a, te na reira maira Iehova; e i hoi te fenua i te ite ia Iehova mai te vairaa miti e i te miti ra." Isaia 11: 9.

Te vai nei te tau e tuu atu ai te taata'toa i to ratou turi i raro, e e fa'i noa ia te mau vaha'toa ra e, e o Iesu Mesia te Fatu ra, te upootia o taua basileia ra. Phil. 2: 11; Apok. 5: 13; Korinetia 1, 15: 25.

40. Ia tae mai te tau mau ra, e riro ai te mau basileia atoa ra ei basileia no te Fatu ra. Apok. 11: 25. Ei reira e pûpû atu ai oia i te basileia i te Atua, i te Metua ra.

"O te hopea iho â ia, e pûpû atu ai oia i te basileia i te Atua, i te Metua ra; ia hope roa te mau hau, e te mana, e te puai i te faaorehia e ana." Korinetia 15: 24.

Te Feia o tei Tamau Maite i te Faaroo e te Ohipa i Roto i te Basileia o te Atua e tae Noa'tu i te Hopea ra, ei Roto â

Hoi Ratou i te Basileia o te Ao ra, e tei ia Ratou

Ra hoi te Ora Mure Ore.

(E tuatihia teie nei parau.)

Faaturahia te Fare Pureraa Momoni E te Katorika e te Farani

I roto i te avae Ditema i mairi a'enei, tae atura te pûpû himene rahi no te Ekalesia Katorika tumu i Roto Miti, i Utaha, i Amerika, mai te faatia i te hoê himeneraa rahi i roto i te fare pureraa rahi menemene no te Momoni i reira. Teie to ratou hi'oraa i te mau peu a te Momoni, e faahia-hia e faatura i hora ratou i taua mau mea ra. Teie atoa to te Momoni faaroora i te himene a taua pûpû rahi tuiroo a

te Katorika ra, e te parau maira ratou e, aita ratou i faaroo na i te himeneraa navenave mai te reira te huru.

No roto mai teie pûpû himene i te fare pureraa rahi no te Katorika i te oire ra Roma; ei reira ratou i himene noa'i i roto i te mau haamoriraa. Tei roto hoi i te pûpû e 54 tane, i raro a'e i te aratairaa a te taata ra o M. Antonio Rella, e taata toroa atoa oia i roto i te Ekalesia Katorika. E 500 matahiti i mairi a'enei te faatia-raa-hia teie pûpû himene, o tei tauturuhia e te Pope rahi o Pius x; e i teie nei â, tei raro a'e mau i te faatereraa a te Pope rahi. I teie nei na avae i mairi a'enei, te farerei haere atura ratou i te mau vahi roo maitai no te fenua Amerika, a tae atu ai ratou i rotopu i te Momoni.

Ia oti ta ratou himeneraa i roto i te fare pureraa menemene, titau maira o M. Antonio Rella ia faataihia te hamonia rahi a te Momoni ia faaroo atoa ratou i te reira; e ua na reirahia. Faatai ihora te taata mono faatai no te fare pureraa menemene, o E. P. Kimball to'na i'oa, i te hamonia; e maere ana'e ihora to te pûpû himene, e oti a'era te faatairaa, na ô maira te taata faatere o M. Rella: "O te hamonia navenave roa e te numera hoê teie ta'u i faaroo i te ao atoa nei."

Tae Atoa'tura te Hoê Taata Farani

I muri a'e i te taeraa'tu te pûpû himene Katorika i Roto Mitî no te himeneraa i roto i te fare menemene, tae atura i reira te hoê taata faatai hamonia no Farani, o M. Marcel Dupre to'na i'oa. E taata tuiroo rahi teie no te ohipa faatai hamonia, e faatiahia ihora te hoê faatairaa i roto i te fare menemene i nia i te hamonia rahi a te Momoni. Ua tausani te taata tei faaroo i ta'na faatairaa, mai te parau e, aita'tu taata faatai mai ia'na te huru. E parau atoa maira o M. Marcel Dupre e, aita'tu hamonia mai ta te Momoni te huru.

Te Mau Parau Apî Radio

I roto i Fepuare i mua nei e tae ai te hoê nuu manuâ Tapone i Nuzilani e Taratoni, e tere mataitai.

Ua itea-faahou-hia te hoê raau apî faahia hia rahi no te rapaauraa i te ma'i purumu, oia hoi, te Tona, e no te paru-ru-atoa-raa'tu i taua ma'i ra.

I te 12 o teie avae e tere mai ai o Aneiura te pahi tira 4 tamatini, uta tao'a mai Amerika i Tahiti uei.

Te opua'toa ra te Heleni e haapae i te faatereraa hau arii, ua puai to ratou hinaaro i te faatereraa hau Repupirita. Te opua ra hoi te arii Heleni i te reva ê atu no reira'tu.

Ua tae atoa ta te Purutia aniraa i te Farani, e horoa atu na ratou te maa, e no te reira e piri mai ratou i te vetahi mau faufaa. Aita mai te mea ra e ua fariihia taua aniraa ra.

Faaiteraa no Ruru

Ia hinaaro outou i te tape'a, e te uati, noa'tu te huru;

Ia hinaaro outou ia hamanihia to outou mau tape'a, te pine, te tautau;

Ia hinaaro outou ia tataibia to outou mau tape'a;

Ia hinaaro outou i te hoo mai i ta outou mau tiko, te patoetoe, te mau tape'a tahito, te hei pupu, etc.;

Ia hinaaro outou ia papaihia to outou mau i'oa i nia e aore râ i roto i to outou mau tape'a, te pine, e te tautau;

Ia hinaaro outou ia faaapîhia to outou mau tape'a tahito;

Haere i o Ruru

*to'na tho â fare parai rea ute
te aroa Petite Pologne*

PAPEETE

Ua Neneihia Anei To Oe Hoho'a

Aita'tu e tao'a nehenehe e te faufaa hoi i te hoho'a—no oe iho, no te tane e te vahine, no te aiû apî, no te metua ruau, e aore râ no te utuafare.

E tei te fare neneiraa hoho'a a Viriamu te mau ravea apî e papu roa'i e e nehenehe roa'i te mau huru hoho'a—i te moni māmā hoi.

Eiaha e tia i noa—haere râ i teie nei, no te mau hoho'a ta oe i hinaaro.

William Crake

I pihaiho i te Fare Moni Initia Taina
PAPEETE

Taihaa Api

No nia mai i te pahi Farani.
Ua rau te huru o te AHU,
te MAA PUNU, MONAMO-
NA, e te tahi atu â taihaa
nehenehe.

Maere Mai e
Mataitai

Fare Toa No Aiu.

FARE TAMAARAA TINITO

I Tatahi tei fatata i te fare toa no Pute

Teie te Hooraa

Te mau roi auri, roi raau, roi veo;
Te mau afata ume, afata roa, afata
raau noanoa, afata ma'i (pohe);
Te mau huru UPAUPA, Mando-
line, Guitare, Ukulele, e to'na
mau niuniu atoa;

Te mau huru peni vaa, Fare, Pere-
oô, Afata Ume, e te tahi atu â.
Tei reira'toa hoi te hamani raa e te
tatairaa i te mau huru haneti atoa.
Tei reira'toa te mau hahu raa, e te
êê raa raau.

Tei reira'toa te tarahu raa Pereeo
uira: taniuniu noa io Bambridge,
Papeete, ia tae atu te Auto, no-
a'tu te hora i te pô e te ao.

Bambridge, Dexter, & Co.

oia hoi io TIHOTI MAEHAA

Te vai ra i mua i te to'a a Ruru te parau apî RADIO
iritihia na roto i te re'o Tahiti.

Te tiaturi ra o Pussyfoot te taata patoi ohipa inu ava
e, eita e maoro e ore te reira peu i Afirita apatoa.

Ua taparahi-pohe-roa-hia o Sun Mays te Raatira rahi
aratai nănă eiâ Tinito, no te faarueraa i to'na nuu orure, o
te haapeapea noa i te Hau Tinito.

Te faaitoito noa ra te apooraa Beritane rapaau oovi, i
te imi i te ravea papu e ore ai te parareraa o taua ma'i rahi
ino roa ra.

Eiaha roa e ore i te haaparare i te parau ra e, ua tupu
te rapaauraa tamoni ore i te ma'i purumu i Papeete nei;
e noa'tu te huru o te taata e haere, e farii-noa-hia mai. O
te hoê tera ohipa maitai rahi.

Ua itehia e te mau taata paari haapii fetia o te ao nei te hoê maramarama apî e te maere i roto i te reva, e mana'o i hora ratou e, te tamata nei to te tahi ao i te atea ê ra i te paraparau mai i to te ao nei. Te hi'opoa-maite-noa-hia nei taua maramarama apî ra, mai te imi i to'na auraa mau.

Ua hi'opoahia e te Hau Amerika te mau huru oriraa tahito a te mau taata Inidia Amerika, e ua itehia e, aita roa i au ia faatupu-faahou-hia tera mau huru oriraa i rotopu i te feia Cheresetiano no te anotau hopea nei. No reira, ua opani-etaeta-hia te tahi mau huru ori, mai te a'o'tu e, eiaha ratou e ori faahou i te reira huru. Ua fatata roa te reira mau oriraa tahito a te Inidia i te huru o te otearaa i itehia i Tahiti ma nei, o tei ore hoi i au i rotopu i te feia Cheresetiano no te paeau fenua moana nei; no reira, faaore tatou i teie huru oriraa i rotopu ia tatou nei.

Eiaha E Fiu

I te parau no te pua a te

Faretoa a Pute

PUA API

Hamaniraa apî teie—mea pâpû, eita roa'tu to rima e pau, e eita to pute e puta.

A. Leboucher

PAPEETE

Tamuta Hamani Pahi e te Fare

Mai te mea e, te opua nei oe i te hoo i te tahi poti tere roa a'e i te tahi atu â mau poti, haere iô PERO, oia hoi, F. R. & I. E. WALKER, na ratou e hamani i taua poti ra ma te maitai e te hoo māmā.

Haere na a mataitai i ta ratou mau hobo'a poti, haere na a mataitai i ta ratou aua hamaniraa pahi.


Farerei na ia PERO ma, no te hamaniraa i to oe fare, eita oe e tata-rahapa.

Afai na ta oe mau iri raau i hinaaro i te êê e te hahu ia PERO ma, na ratou e rave.

F. R. & I. E. WALKER

PAPEETE

Na Reno e Hamani i Te Pereoo



Tei ia'na te mau ravea apî. Noa'tu te mea i pararî,
Afaï mai i to outou pereoo na Reno e hamani e faaeta-
paruparu. eta faahou.

Te hamani atoa nei Reno i te mau mea atoa i pararî
—noa'tu te mea—noa'tu to'na huru—afai mai.

N. C. REYNOLDS, oia **RENO** tane

Tei te fare neneiraa hohô'a a Viriamu i tai a'e i te toa
a Tihoti Maehaa e te fare moni, te fare toa e te
hamaniraa pereoo taataahi a Reno i teie nei.

Ua tupu te ohipa radio i Amerika i mua roa, a riro ai
ia ei mea maere i to te ao nei. I roto i te avae Ditema i
mairi a'enei, faatiahia ihora te hoê tamataraa i te oire Bos-
ton i Amerika, a faaroo ai te hoê tiaa rahi taata, e piti
tausani ia tai'ohia. Ua faaroo papu ihora ratou paatoa i te
mau paraparauraa, te mau himene, te mau faatairaa, etc.,
i faatupuhia i te fenua Beritane, i te fenua Farani, i Puru-
tia, i Rusia, i Norway, e i nia i te mau pahi i te atea ê roa
i tua. Ahiri e, ua faatiahia te hoê o taua mau matini ra i
Tahiti nei, e nehenehe ai ia tatou ia faaroo noa i te mau
a'oraa parau, e te mau himene, e te mau faatairaa i te mau
oire no Amerika.

O. B. Peterson, "Imprimeur,
Rue Brea et de la rue Dumont d'Urville, Orovini, Papeete